

Siunnersuut uunga: imeruusaatit qiimmassaatinik akullit (energidrik) inunnut 18-it inorlugit ukiulinnut tuniarnissaannik sassaalliutiginnissaannillu inerteqquteqarneq, kiisalu imeruusaatit qiimmassaatinik akullit allagartalersorneqartarneri ussassaartigineqartarnerilu pillugit Inatsisartut inatsisaat nr. xx, xx. xxxx 2012-imeersoq
(Naalakkersuisut)

Naqqiut
Akissuteqaat, 21. november 2012-imeersoq taarserpaa

Akissuteqaat
(Peqqissutsimut Naalakkersuisoq, Agathe Fontain)

Aappassaaneerineq

Ilaqutariinnermut Peqqissutsimullu Ataatsimiititaliap isumaliutissiisummi sukumiisumik nassuiaateqarnera Naalakkersuisut qujassutigaa. 18-it inorlugit ukiulinnut imeruusaatinik qiimmassaatinik akulinnik nioqquteqartoqarsinnaanissaa pillugu apeqqummut partiit assigi-inngitsut assigiinngitsunik isummersuuteqarnerat nassuiaammi ersippoq.

Inuit Ataqtigii siunnersuutip taama isikkoqartillugu akuersissutigineqarnissaa innersuussutigaa. Siumup 18-inik ukiulinnut killiliineq qaffasigalugu siunnersuutip itigartitsissutigineqarnissaa innersuussutigaa. Nammineq piumassuseq tunngavigalugu Kommuneqarfik Sermer-suup, CSR Greenlandip niuertarfiutillillu arlallit, atuarnerup nalaani meeqqanut imeruusaatinik qiimmassaatitalinnik tunisisanniginnissaa pillugu suleqatigiinnissamik isumaqtigiissutaat, qiimmassaatitalinnik imeruusaatitornermut atatillugu ajornartorsiutaasimasumik qaangiisitsisutut imaluunniit annikillisisitsisutut nalilerlugu siunnersuutip itigartitsissutigineqarnissaa, Demokraatit Atassutillu innersuussutigaa.

Inatsisissatut siunnersuut saqqummiussaa - Naalakkersuisut isumaat naapertorlugu - siusinnerusukkut Inatsisartut imeruusaatit qiimmassaatinik akullit pillugit aalajangiinerinik oqallinnerinillu Naalakkersuisut ilumoorfiginninneraat. Demokraatit Atassutillu inatsisissatut siunnersuummut akerliliissutaannut tunngatillugu – tassalu meeqqat imeruusaatinik qiimmassaatinik akulinnik annertuallaamik atuinaveersaartinnissaannut niuertarfiutillit tapersersuiniererat – soorunami assut nersortarialittut Naalakkersuisut isigaa. Taamaakkaluaq taamaaliorneq meeqqatta inuusuttattalu peqqissusaannik ajoqusiisinnaanermut naammaginnartumik illersuutaasinnaasutut Naalakkersuisut isiginngilaat. Meeqqanut imeruusaatinik qiimmassaatinik akulinnik tunisisarniaratik niuertut iluminni isumaqtigiissuteqarsimanerat ilumoorpoq, kisiannili qanoq ilillutik inerteqqutip tamatuma eqquutsinneqarnissaa, taamatullu

meeqqat kiisalu atuarnerup nalaata qanoq nassuiarneqarnerat ilisimatitsissutaanngivipput. Tamatuma saniatigut meeqqat inuusuttullu qiimmassaatitalinnik imeruusaatitunnngilluinnartussatut Naalackersuisut isumaqarfigaat.

Meeqqat inuusuttullu imeruusaatinik qiimmassaatitalinnik imigaqartarnerannut tunngatillugu ajornartorsiutip annertusiartornera ilumoorpoq. Nunatsinni nunanilu allani atuarfiit inuusuttunillu sullissiviit meeqqat inuusuttullu qiimmassaatitalinnik imeruusaatitorsimanerup kingunerisaanik aallaamasarnerannik kajumissuseqannginnerannillu ullut tamakkiallugit nalunaaruteqartarput. Meeqqat inuusuttullu qiimmassaatitalinnik imeruusaatitornermikkut koffeinimik pinngitsuuisinnaajunnaartartut, ullormullu tamakkutunnngikkunik iluaalliulersartut niaqorlulersartullu, Qallunaat Nunaanni inuussutissat pillugit Aqutsisoqarfimmi/Fødevarestyrelsimi immikkut ilisimasallit oqaatigaat. Meeraq inuusuttorluunniit ullut tamakkianagit, ilaannikkuninrarli qiimmassaatitalimmik annertuumik imeruusaatitortartuugaluarpalluunniit, tamanna navianaatilimmik, ilaatigut eqqissiveerunnermik, annilaanganermik aamma aqajaqqup inalukallu sulinerisa akornuteqalernerannik kingunerluuteqarsinnaavoq.

Qallunaat Nunaanni inuussutissat pillugit Aqutsisoqarfiup inassuteqaatai naapertorlugit meeqqat inuusuttullu oqimaassusertik nappertorlugu kiilumut ataatsimut ullormut koffeinimik 2,5 mg-imit annertunerusumik akulimmik imigaqassanngillat. Taamaasilluni meeqqap 40 kiilunik oqimaassusillip ullormut koffein annerpaamik 100 mg – qillertuusaq imeruusaat qiimmassaatitalik 0,25 l-imit imartussusilik ataaseq sinnilaaminerlugu taamaallaat pisinnaavaa. Koffeinili imeruusaatini allani, soorlu kaffimi, tiimi, kakaomi sukkulaammilu aamma akugitinneqarmat, meeqqat inuusuttullu koffeinitugarisinnaasaannut killiliussaq piaartumik qaangerneqassaaq.

Qallunaat Nunaanni inuussutissat pillugit Aqutsisoqarfiup inassuteqaatai naapertorlugit, 2011-mi decembari qaammat imeruusaatit qiimmassaatini akullit - meeqqanit imerneqartariaqanngilluinnarnerat pillugu mianersoqqussutinik - allagartalersorneqarnissaat Qallunaat Nunaanni atuutilersinneqarpoq. Allagartalersuinissamat maleruagassat sukannersut, Qallunaat Nunaanni atuarfinni inuusuttullu klubbiini arlalinni, imeruusaatinik qiimmassaatitalittoqqusaannginnermik malitseqartinneqarputtaaq.

Naalackersuisut isumaat naapertorlugu meerartatsinnik inuusuttatsinillu sapinngisarput tamaat uerinartunik eqeernartulitornissaannut – arlalippassuarnik ilaatigut eqqissiveerunnermik, annilaanganermik, niaqorlunnermik allatullu timikkut iluaalliuuteqarnermik kingunerluuteqartunut – illersuinissaq uagut qinikkatut pisussaaffigaarput. Meeqqatta inuusuttattalu inuunerisuunissaannut akisussaaffik taama pingaaruteqartigisoq niuertarfiutilinnut isumagisas-sanngortissinnaanngilarput.

Ilaqutariinnermut Peqqissutsimullu Ataatsimiititaliami amerlanerussuteqartut inatsisissatut siunnersuutip itigartitsissutaanissaanik isummernerat Naalackersuisut ataqqivaat, Naalackersuisut pingajussaaneerneqarnissaanut periarfissaq atorlugu allannguutissatut siunnersuummik saqqummiussissapput imeruusaatit qiimmassaatini akullit (energidrik) inunnut

18-it inorlugit ukiulinnut tuniniarnissaannik sassaallitiginissaannillu inerteqquteqarneq, meeqqat 15-it inorlugit ukiullit illersorumallugit imeruersaatit qimmassaatinik akuinut ulorianartunut.